

Sujet:

„S glo-bâle Theater“

...Traa traa trallalaa....

Vorhang uff! – Mir feehn jetzt aa!
„...Nur mit was?“ mien mir ys frooge!
Will hitzuedaags wird im hoche Booge
e jeede Misch grad iber Nacht
zumene **globâle Theater** gmacht!
Wenn d s nit glaubsch, muesch
wytterlääse,
denn wirdsch e ganz belääse Wääse
und merggsch au ohny „alma mater“:
D Wält wird zum **globâl Theater!**

Ellai scho s Uffschloo vo dr Zyttyg
macht Geegner geege Geegner gyttig!
Und looht sy denn ohny z ibertrybe,
als Lääser „Lääser-Brief“ lo schryybe.

...Traa traa trallalaa....

hesch Du au scho **Theater** gha?

Zem Byschpyl het dr Basler – ämmel e
Dail- ,
d Ydee vonere „neye Grammatyg“ fail!
Är beschrybt, wieme neyerdings sett
schryybe
(doch die maischte leehn das Schryybe
blyybe!):
Doo macht dr Meriaa-Verlag allem
Aaschyn aa,
en Aige-Gool... - Aber me het e **Theater**
gha!
Oder d Inytiatyve vo dr eSVauPee,
wo sait, was mit Delinquänte miessy
gscheh:
Uf dass me schtatt „Cümülüs“ – rächt
iberlait –
wider „Kumulus-Karte“ sait!
(D Schtelle-Lääry wird zwar wider grooss,
aber Hauptsach, mr sin das **Theater** loos!)
Und wo d Somaruga letschemänd
nit zfriide isch mit em Departemänt,

ghersch mängge (si – dasch nit zum
Lache!)
do kennt me druss e **Theater** mache!
Oder wo noo dr Abschtimmyg gwissy Baize
mitem „Fümoir“ dien d Lunge raize,
gheersch d Lunge-Liga mit ihrne
Gsundhaits-Pater:
„Jetzt isch gnueg, daas git **Theater!**“

...**Biireschnitz und Haselnuss,**
jetzt isch **globâle Theater** duss!

Syyge mr ehrlig: S wird uss jeedem Brunz
hitzuetaags fir „Hinz und Kunz“
e **Theater** gmacht, wo nur bedingt,
unsry Wält au wytters bringt!

Oder: Interessiert e Schwoob
em –minu sy Gwirzkueche-Gwirz-Byygoob?
Oder interessiert sich ebbe dr Berlusconi,
eb dr Toni mitem Vroni „mit oder ohny...“?
Oder intressiert dr Sarkosy,
ass dr „Koch“ ney z Rom duet Roma syy?
Oder dänggsch, dass dr Kim Yöng-nam
interessiert isch am lengere 3er-Tram?
Oder intressiert dr Maa im Mond,
eb sich e Famylie-Garte iberhaupt no
loohnt?
Ebbe nit! – Do griegsch dr Kater!
Wurum also das ganze **globâl Theater?**

Traa traa trullaluff

Das **globâle Theater** macht ys muff!

Mit settyge **Theatersache**
kenntsch d Lische lengschtens no lenger
mache!
Als Byschpyl d BaZ, wo sich „rächts“ duet
gschtalte
und no khasch bhalte - zem Fluugy falte.
Nit z vergässe dr finanzielly Bammel,
will s **Theater-Gäld** fäählt by de Rammel.

Dass me sich an Queeryshtyyger deeg
shteere,
will sich Das firs Lehre nit wurd gheere.
Und zletschemänd das **theatraale**,
eb dr Lumengo fir d Waahle haig miesse
zaahle...
Do kunnsch dr doch – es isch doch woohr
(!),
wie im **Käschperli-Theater** vor!

Traa traa trullaloo
Dr Käschperli isch wider doo!

Hesch Du jetzt au (eb Frau oder Maa),
e rooty Zipfel-Kabben aa?
Und froogsch dy au, was das alles soll?
Und hesch vom **Theater** au d Naase voll?
Wenn jetzt -by dir- dien d Gydangge
purzle...:
Willkomme by uns, de **Pierrot-Wurzle!**

